

24 FEB 2003

NAM-Palang Merah/I

PALANG MERAH ANTARABANGSA SEDIAKAN PELAN KECEMASAN BAGI IRAQ

KUALA LUMPUR, 24 Feb (Bernama) -- Jawatankuasa Antarabangsa Palang Merah (ICRC) telah menyediakan pelan kecemasan sebagai persediaan sekiranya perang meletus di Iraq.

Naib Presidennya Eric Roethlisberger hari ini berkata ICRC telah mengerahkan pekerja kemanusiaannya ke Iraq dan negara-negara yang berjiran dengannya bagi memastikan mereka dapat memberikan bantuan kemanusiaan apabila keadaan memerlukan.

"Kami melaksanakan pelan itu mengikut fasa demi fasa," katanya pada sidang media di luar Sidang Kemuncak Ke-13 Pergerakan Negara-negara Berkecuali (NAM) di sini.

"Kami membuat persediaan itu secara senyap dan tidak secara terbuka sepertimana mereka yang akan pergi ke medan perang," katanya.

Beliau berkata rakyat Iraq akan lebih menderita sekiranya perang baru meletus ekoran mereka sudahpun lemah akibat perang dan konflik antarabangsa di negara mereka sejak dua dekad lepas.

Sekiranya perang meletus, ICRC akan menghulurkan bantuan kepada orang awam yang kehilangan tempat tinggal, cedera dan kurang upaya, katanya.

Roethlisberger juga mengingatkan dunia agar menghormati undang-undang antarabangsa yang melarang penggunaan senjata yang akan mengakibatkan manusia menanggung penderitaan teruk.

Beliau juga berkata negara-negara yang terlibat dalam perang tidak patut memaksa rakyat mereka menjadi perisai manusia kerana ia melanggar undang-undang kemanusiaan antarabangsa dan sekiranya mereka berbuat demikian atas kehendak sendiri, adalah menjadi tanggungjawab negara berknaan untuk melindungi "perisai manusia" itu.

Katanya ICRC masih ada tugas yang belum selesai di Iraq sebelum timbul ancaman perang di negara itu seperti menyediakan bantuan bekalan air kepada rakyat Iraq dan menangani masalah kekurangan bekalan ubat-ubatan akibat sekatan yang dikenakan Pertubuhan Bangsa-bangsa Bersatu.

Beliau juga menyambut baik gesaan Perdana Menteri Malaysia Datuk Seri Dr Mahathir Mohamad kepada masyarakat antarabangsa agar mengharamkan perang.

-- BERNAMA

JM MFJ RHM